


Proyectonan di evangelizacion den Semana Santa tabata exitoso



ORANJESTAD (AAN)-- Durante e temporada di Semana Santa a ser teni algun actividad di evangelizacion organiza pa Faith Revival Center como parti di un proyecto pa trece e mensahe di e Palabra di Dios na tur hende.

Por ehempel na Cas di Cultura a ser presenta e obra "James y su familia" cu ta trata e storia di un hoben cu su bida tabata worde dirigi door di un bida di paranda, alcohol y droga y sin menciona cu e bashi espiritual den su bida tabata basta grandi.

Akinan James a ser acerca pa un otro hoben cu a comparti cun'e un mensahe di speranza y door di dje James a ricibi Hesucristo den su bida y asina su bida a worde cambia radicalmente.

Den e obra aki a conta cu e participacion di mas of menos un 20 actor cu a hunga diferente papel manera James su familia, hobennan cu James tabata predica y tambe personahenan di Bijbel cu a sirbi pa ilustra e mensahenan na e publico.



E obra aki ta representa e cambianan cu un persona por experiencia ora cu nan ta permiti pa Hesucristo tuma e control di nan bida y reconoce cu E ta e unico Señor y Salvador di nan bida.

James a comparti e mensahe di salbacion na tur esnan cu tabata den e mesun situacion cu e tabata pasa aden prome cu e la ricibi Hesucristo den su bida y dor di esaki James su bida tabata den peliger pa e menazanan cu e doño di un night club tabata haci contra u persona. Su familia tabata previni'e di e consecuen-

cianan di e menasanan contra su bida, pero esta James a declara cu si Hesucristo a muri p'e na e cruz di Calvario pa paga e prijs pa su picanan, cu e mesun amor e ta dispuesto pa duna su bida pa hiba e Palabra di Dios na tur hende ya cu manera e apostel Pablo a bisa: "Cristo ta mi bida, morto ta ganashi".

Tambe James a confronta e situacion di e bida desastroso cu su familia tabatin y a trece e mensahe aki na nan tambe, pero su mama so no tabata di acuerdo cu tur esaki ya cu e tabata mara na su creencianan apesar cu e tabata un persona cu tabata sufri di diferente malesa y a manifesta cu asina e la nace y asina e lo muri y cu e malesanan aki ta e cruz cu Dios a pone ariba su bida. James a splike cu e malesanan aki no ta di Dios y alcontrario Dios ta un Dios di Sanidad y misericordia y e mester rechaza e malesanan aki den nomber di Cristo Jesus, pero su mama tabata sigui bisa: "Asina m'a nace i asina lo mi muri".

Na e final di e obra aki e familia a ser confronta cu un noticia hopi doloroso, cu James tabata para pafor di un night club ta predica hobennan adicto na droga anto diripiente un hombre a sali for di un auto y a tir'e mata. E dia cu e a se dera un grupo di hobennan cu a bay cerca su familia pa duna condolencia a duna testimonio na e familia di e cambianan cu nan a experiencia den nan bida despues cu James a trece e mensahe di salbacion cerca nan, di a manera aki James su familia a acepta Hesucristo como Señor i Salvador di nan bida



cu excepcion di su mama cu tabata mara fuertemente na su creencianan y cu un biaha mas a manifesta na e momento ey cu e lo muri asina, diripiente e la cuminsa sinti su curpa hopi malo y eynan mes a cay morto.

James a ser hiba na Cielo y eynan e la topa cu un cantidad grandi di angelnan cu tabata duna alabansa i adoracion na Dios, y tambe e la mira un angel cu un buki den su man y James su nomber tabata skirbi den dje y akinan James a manifesta su goso y alegria

di por keda den e lugar aki pa semper y Jesus a sali na su encuentro y a pone un corona riba su cabes.

Despues di esaki e escenario tabata otro ora cu tur cos a bira scur y unicamente e angel cu e buki tabata presente, James su mama a cana cerca e angel cu e buki i ora esaki a puntr'e pa su nomber esaki no tabata registra den dje. Jesus a bis'e cu awor e no por haci nada mas p'e y cu awor e lugar cu e ta pasa henter eternidad a worde prepara anto un figura maligno a sali

na su encuentro y na lastramento y gritamento e la ser hiba na fierno.

Basta publico tabata presente na e obra aki y por a scucha bon comentarionan di e obra aki, asina tambe dialuna tabatin un actividad na Eagle Beach cu e naomber Beach Celebration, esaki tabata un concierto di alabansa y adoracion y a conta tambe cu e participacion di personanan cu a bin conta e testimonionan di loka Hesucristo cu su Poder a haci den nan bida.